

Museum La Truaisch cun novas attracziuns

Cull'entschatta fenadur arva il Museum La Truaisch a Sedrun puspei sias portas per la publicitad. L'exposiziun permanenta da cristallas ei vegnida augmentada cun in'ulteriura collecziun e da veser en in'exposiziun speciala ein sculpturas ed entagls.

HANS HUONDER/FMR

Duront la stad ei il Museum La Truaisch a Sedrun aviarts mintgamai dil fenadur entochen la fin d'october. En ina bellezza casa situada gest spel Bogn Sedrun muossa el la veta dils onns dalla fin dil 19avel e l'emprema mesadad dil 20avel tschentaner. Sil visitader spetga denton era ina bellezza exposiziun da minerals e cristallas.

Collecziun d'Ignazi Albin

Sill'entschatta dalla nova stagiun da stad 2023 ei la partiziun da mineralias vegnida enrihida cun ina bellezza collecziun. «Il museum ha giu l'unica caschun da comprar si dalla Bassa la collecziun dad Ignazi Albin. Entginas cristallas ein singularas, aschia in mulau clar, in péz brin cun alas fier ed in Milarit», di *Tarcisi Hendry*, president dalla cumissiun da menaschi e curatur dil museum. Ignazi Albin che ha viviu da 1933 entochen 1987 ei naschius a Tschamut. Suentar las scolas dil vitg ha el fatg igl emprendissadi da miradur a S. Gagl. El ei staus maridau, mo ha giu negins vegnensuenter. Sia patria da cavacristallas era il Cavradi. «Sia grondiusa collecziun ei ida en mauns jasters ils onns 1990. La stad 2022 s'annunzia il possessur cul giavisch da vender favoreivlamein la collecziun al Museum



In bellezza exemplar ord la collecziun da cristallas e minerals dad Ignazi Albin. FOTOS MAD



Ina sculptura da Tumaisch Monn-Soliva.

La Truaisch. Siu giavisch ei staus quel che quellas bellezza mineralias tuornien anavos al liug d'origin», di Tarcisi Hendry. Ussa ei la collecziun che cumpareglia ver 50 tocs da veser el museum.

Sculpturas da Tumaisch Monn

Dumengia, ils 2 da fenadur 2023 allas 19.00 ha liug el Museum La Truaisch la vernissascha dall'exposiziun da lavurs da Tumaisch Monn-Soliva da Sedrun. El ha viviu da 1923 entochen 2005 ed ei staus in um fetg engaschau sin differents secturs dalla veta dil mintgadi en Val Tujetsch. El ei staus gearau duront sis onns, ha sunau 28 onns ella societad da musica e cantau buca meins che 54 onns el Chor baselgia Sedrun. El ha denton era fatg teater e menau reaschia. Leutier haveva el in dun artistic. El rimmava ragischs e nezegiava quellas per formar figuras, denter auter era fatschas. Figuras da muntada religiusa s'udevan leutier aschi bein sco la formaziun per exempel era da crucifixs. L'exposiziun speciala da questa stad el Museum La Truaisch a Sedrun muossa in tschuppel da quellas bialas ed interessantas ovras da Tumaisch Monn-Soliva.

Temps d'avertura dil Museum La Truaisch: Mardis, venderdis e l'emprema dumengia dil meins mintgamai dallas 15.00–18.00.